

# Scheibenschlagen

2008

---

---

Nachname Vorname

Löschgruppe Graf-Gurnau

---

---

## **Grafer Kapelle**

Liabe Leit, heint mecht mar enk olla schia begrießa,  
wos d'rnoch iatz kimmt, sell kuan verdrießa.  
Noch oltem Brauch tia mar ou Böller schiaßa.  
A Verübl, dös war ins gor it recht,  
a Hetz muaß sei, wega dem tia mar's decht.  
D'Fuirwehr tuat enk in dr Noat olli halfa,  
drum seits it beas und lot'sas galta.

Die earscht Scheiba, die hella,  
keart dr Grafer Kapella.  
Daß dr hl. Johannes von Nepamuk weiterhin über ins wocht,  
und in dr letschta Stund für olla a Fürsproch mocht.

Da Böller hobts keart, iatz gia mar's on,  
zearscht keima huira d'Gurnauer dron.

## **Thöni Maria**

Dia Scheiba tia mar weit auße schießa  
und damit die Thöni Maria begrießa.  
Mir winscha dir viel Glück auf deem Lebensweg  
und dass kua Kronkheit steht im Weg.

## **Fam Juen Klaus Anna**

Dia Raketa loss mar weit auch amarschiara,  
und tia dr Anni und im Klaus zum 1. Urenkala gratuliera;  
weil ins isch kema zu da Ohra,  
dass eis Uroma und Uropa seids gwoara.  
Dass er schua Uropa isch, merkt ma im Klaus jo nit on,  
er holtet sich fit, so guat er konn.

**Firma Maschler Karl**

Beim Maschler Karl do waha die Fahna im Wind  
iatz kimmt ja bald die Zeit wo ma Autoschaua kimmt!  
Mir hoffa dein Gschäft louft guat  
und hola a schiane Scheiba aus der Gluat.  
A Raketa und an Schuss zum Schluss nocha set huira nuit passiera  
und vielleicht hasch a Klunigkeit für d Fuirwehr übrig, wenn mar kema kassiera.

**Siegele Angelika**

Die Geli isch a agile Frau,  
die hat viele Sportarten drau.  
Im Summer auf die Berg mit'm Freind sall isch a Freid,  
bei so uaner Hütte isch glei a nettes Gread.  
Mir hoffa du tuasch die neagscht's Jahr wieder so sportlich engagiera,  
drum tuat die Scheiba b'sonders weit außi marschiera.

**Siegele Gerd**

Mit deara Scheiba begrießa m'r in Siegele Gerd,  
vo deam hamm'r huira wieder nuit keart.  
Gerd, tuasch du unterm Jahr die Beweise vernichta,  
damit mir kenna nuit dichta?  
Neagscht's Jahr tuasch hoffentlich a paar mal was Unanständiges treiba,  
damit beim Scheibaschlaga muasch ou amal wieder leida.

**Fam Siegele Waldemar**

Dr Waldemar gonz im junga Stil  
holtet vo halbe/halbe ziemlich viel.  
In dr Kucha stellt er si gor nit potschat on  
beim Erdäpfel schäla und kocha stellt er sein Monn.  
Wenn dr Ruth ihr Gsundheit Probleme mocht,  
schmeißt er den Hausholt, des war decht glocht.  
A Raketa schiaß mar aucha no z'lescht,  
und wünsch a enk Gsundheit und s'ollerbescht.

**Fam Juen Josef Paula**

Als erschts well mar am Seppl vergelts Gott sogä,  
dass mar derfa die Scheiba über sei Wiesa ocha schloga.  
Zu seim 70-er hot dr Seppl mit seiner Familie an Ausflug gmocht,  
mit Kind und Kegel, er hot an gonza Bus voll brocht.  
Miar hoba keart, dass si mit'm Bus ins Südtirol gfohra sei,  
und olla hot's tunkt bsunders fei.  
Iatz hot dr Seppl miaßa operiara gian,  
mir hoffa dass mar ihn secha bold wieder auf seina Wiesa stian.  
Zur guta Besserung loss mar no a Raketa aufsteiga,  
dass mar snegscht Johr kenna über erfreulichere Socha schreibal!

**Fam Juen Hubert Erika**

Dr Hubert hot sein Poschta in Imst guat inSchwung,  
und den Elan setzt er ou dahuam in dr Londwirtschaft um.  
Gmiatli mit dr Mahmaschin mahja isch ihm z'schwoch,  
ober mit'm Mähtrack uma bläsa isch schua a ondere Soch.  
Er fiecht in dem Fald hin und hea, bis kua Halmlia mia steaht,  
und da Wiahlmäus unter dr Eard Heara und Seicha vergeaht.  
Und earsch in dr Neadr im Steila zur Eisenbohn aua,  
do draht's ihn bold ocha, ma kann gor nit schaua.  
Guat, dass in dr Neadr steaht kua Radarstation,  
sinsch tat er schaua, der guate Monn.  
A Raketa schiaß mar in Himmel wunderbor,  
mir wünschä dir und deir Familie viel Glick in dem Johr.

**Juen Julia**

Hallo Julia wia schnell dia Zeit vergeht,  
iatz kimmt a Scheiba dia dr gonz allua kehrt.  
Hasch super die Lehrzeit hinter di bracht,  
in Abschluss au no bestens gmacht.  
Und für dein weitem Lebensverlauf,  
haut dr die Fuierwehr a Raketa mitdrauf.

**Fam Schmid Helmut Linde**

Unter'm Schmid Helmut's Haus hot ma k'herat dia Padler fluacha  
Weil sie hoba si miaßa an nuia Durchgong sucha.  
D'r Heli hot s'Wasserrecht miassa über d'Sanna verlega  
weil im Langets wor in der Naed'r jo nit viel Rega.  
Dia Schläuch haba dia Paddler irritiert,  
des hat da Heli ober gor nit g'stiert.  
Daß dia Wiesa huira guat waerd und an Haufa bringt  
iatz für enk nou a Raketa singt.

**Fam Schmid Harald Angelika**

D'r Harry tuat sich beruflich saggrisch engagiera,  
und die Karriereleiter nach oben marschiera.  
Personalchef sein isch schua a super Sach,  
da hat ma viel Verantwortung aber ou a ganz interessantes Fach.  
Als Chef von d'r Traktion von Tirol und Vorarlberg hat d'r Harry an haufa Leit  
zum dirigiera,  
da muss'r schua in oana oder andara Schlachtplan kreiera.  
Dia Lokführer wera unter deim Kommando sicher pariera,  
und nach deine Anweisungen marschiera.  
Beförderungen verteila und nuies Personal einstella,  
Harry deas hasch eppa olli schua wella.  
D'Fuierwehr tuat d'r herzlich gratuliera,  
und lasst a schiane Raketa in Himmerl auchi marschiera.

**Schmid Daniel**

Dr Daniel isch beim Fußballna sehr ongaschiart,  
bei ihm funktioniert der Doppelpass wie gschmiart.  
Die Matura hot er huira ou nou zum Mocha,  
dr hot er sicher viel zum Lerna und nit viel zum Locha.  
Dass deis ou guat tuasch mocha,  
loss mar no an Böller krocha!

**Fam Grießer Hubert Rosmarie**

Iatz loss mar a Raketa marschiara,  
und tia im Hubert nochträgli zu seim 50-er gratuliara.  
Im Juni letschts Johr wor des genau,  
do hot er a Feschтли gschmissa in dr Pfadi Au.  
Dabei isch dr Rosi a schiane Überroschung glunga,  
si hot ihrem Schotz a Standli gsunga:  
mit "Merci dass es dich gibt" -  
hot si zoagt, dass si di ou mit 50 no liebt.  
Hubert, loss di vo dena Jahrla am Buggl nu nit irritiara,  
und tua weiterhin auf dem Drohtesel Kondition trainiara.

**Grießer Elisabeth**

D'Elisabeth isch vom Doktor in Innsbruck weck gonga,  
und hot bei ama Rechtsanwalt in Landeck ongfonga.  
Sie hot sich ou miaßa an nuis Auto koufa,  
weil ihr Oltes isch numma so rund gloufa.  
Kouft hosch dr an Hunday Getz,  
mit dem hosch hoff mar no a haida Hetz!

**Grießer Eva Maria**

D'Evi tuat ihr Schual im Deutscha weiter mocha,  
zum drzeila gibt's drum ou nit viele Socha.  
Sie hot huira a Praktikum in Rankweil absolviert,  
des isch gloufa wia gschmiart.  
Auf deis dass mar negstch Johr mia zum Schreiba hoba,  
tia mar no die Scheiba weit ausa schloga.

**Fam Scheiber Helmut Martha**

A Raketa singt aui und an Böller explodiert,  
weil iatz sein miar bar Fam. Scheiber einmarschiert.  
50, -- Helmut isch Dir deas schua klor,  
deas sein 2 mol 25 Johr.  
Hunderttausend flotte Bienen hosch Du ongaschiert  
Und deshalb a nuie Wabenpresse installiert.  
D' Martha beisst deas ober nit,  
Sie geht viel loufa und holtat sich sportlich fit.

**Scheiber Robert**

D'r Robert tuat sie all pott an nuies Auto zulega,  
weil die Alta tian nie lang leba.  
An Justy nennsch iatz dei eigen,  
miar hoffa dear tuat d'r iatz amal länger bleiba.  
Du tuasch iatz im Winter in Kappl die Leit ja mit'm Taxi umchafihra,  
miar hoffa da tuat nie eppas passiera.  
An Böller iatz no ganz laut singt,  
damit d'r Robert unfallfrei durch die Saison kimmt.

**Scheiber Peter**

Dr Peter hot iatz die Lehr guat obgeschlossa,  
ober uamol hot er decht an Bock gschossa:  
bei dr praktsicha Prüfung isch ihm s' Stickli nit gonz glunga,  
und dr Prüfer hot ou a bißli gspunna,  
so hot er miaßa a zwoats Mol ontreta,  
im des Gonze zu retta.  
Im Jänner wor's nocha Zeit s' Baras zum absolviera,  
mir hoffa, dass dir in Obsom nit die Zeacha obgfriara.  
Dia Scheiba loss mar gonz weit außafliaga,  
loss di beim Baras nu nit unterkriaga.

**Rainalter Ekehardt**

A kreative Ader hot er von der Mama kriagt,  
drum hot er Architektur studiert.  
Musikalisch isch er ou gonz guat,  
weil ma öfter eppas von ama Konzert heara tuat.  
Wenn er vo ins als Architekt a z großes Honorar tuat verlonga,  
kriagt er d' Scheiba auf d' Wonga.  
Zu seim Studiumabschluss,  
loss mar iatz no an Böllerschuss.

**Fam Rainalter Ekehardt Hella**

Bei dr Fam Rainalter isch der nuie Renner - Erdwärme und Solarzella,  
und deas alles wega am Spruch vom Van der Bella!  
Dr Eki hat des ja gera salber montiert,  
hatt sich aber noch decht a Hilfe organisiert.  
Er hatt ja gera mia vo dem Zuig aufstella wella,  
da hatt er sich halt um an greaßera Gorta umschaue sella!  
Für Obst und Gemüse isch iatz kuan Plotz mia,  
aber die Solarzella sei ja irgendwie ou ganz schia.  
Auf dass es sich ou bald amol rentiert,  
dr gonza Familie iatz a Scheiba ins Tal acha radiert.

**Fam Huber Robert Gabi**

D'r Robert und d'Gabi, ma konns nit globa,  
sein im siebta Himmel doba.  
Ihr Junior isch d'r Grund für dean Sega  
Dass si iatz kenna a Enkali heba.  
Mit voller Stolz sieht ma si mit'm Poppawoga marschiera  
Drum lossa miar d'rzua ou nou a Raketa marschiera.

**Huber Susanne und Peter**

Enk wear miar huira nit bsunders ,d' reissa  
Ob'r auf Fäll amol an Böll'r schmeissa  
Bam Scheibschloga tat mir geara amol bei enk dahaum vorbeikeama  
nocha kannte miar enk'r n Ofa in Augenschein nehma.  
Miar kama noch auf leisem Fuaß,  
dass enk'r Einbruchsytem nit Alarm schloga muaß!  
Und sett deas ins noch ou gelinga,  
Dafür lossa miar nou a Raketa singa.

**Fam Schütz Egon Sissi**

Di Kinder sei fertig mit'm Studiara,  
iatz tuat's d' Sissy ou no probiara.  
In dr Firma do kannt si schua bold an Computer programmiera,  
ober liaber macht's sie's mit kommandiara.  
Dr Egon studiert ou eppa amol wenn er schua hockt im Büro  
honn i dahum zua gsperrt oder nit  
honn i da Schüssel oder s'Handy mit?  
Drum Egon, do gibt's a guate Medizin  
50+ und der Stress isch dahin.  
Und sumsat weard er ou schua longsom  
weil er olli söt, iatz muass i zu meiner Sissy huam.  
So an Ofa, a Kotza und a Katzli a klianers,  
sog wos gibt's denn schianers.  
Mocht's eis zwoa lei weiter so, dia Richting dia stimmt,  
iatz o a Raketa und an Böller kimmt.

**Schütz Florian**

Seid dar Flo an Arbeit hot,  
geahrt'r numma z'fuaß in d'Stadt.  
Iatz sein die Weag alla viel z'weit,  
mit'm Auto fohra, deas isch gscheit.  
Trotzdem isch er in guater Form,  
sein Sportaufwand isch ganz enorm.  
Kajak, Schi, auf'm Bearg uma springa,  
sogar vur „Munde“ heart man singa.  
Die Leistung alli besser weart,  
je früher ma vum ausgiahn huamwerts geahrt.  
Im Job sou wia im Leaba selts giahn alli durchauf,  
da haua mar an Böller drauf.

**Fam Larcher Peter Margret**

Ross und Motorradla, dös isch nou nit gnua,  
drum kimmt beim Peter nou Radalafohra d'rzua.  
Do isch er fanatisch, ma kann's foscht it globa,  
er isch mit'm Radla foscht auf jedem Gipfl doba.  
A kluans Gortahäusli war ou nou im Bau,  
weil deas war d'r Wunsch von seiner Frau.  
A Trainings-logger isch deas negschte Projekt  
Das deas viel bringt. - iatz an Böller enk dr-schreckt.

**Larcher Mathias**

Da Mathias sigt ma sou guat wia gar numma,  
dear fohrt ja in dar ganz Welt mit am Bus umma.  
Groasse Stars tuat er umma kutschiera,  
und vu uam Konzert zum ondara fiahra.  
Eppas kimmt ins nou in Sinn,  
miar hoba nou a leere Wond in dar Halla drin.  
Da kanntasch ins decht a poor Autogrammkorta bringa,  
und iatz lossa mar nou a Scheiba singa.

**Marianne -Gerhard Kopp (Gäste BRD)**

Insere Deutsche Gäst tia miar recht herzlich begrießa  
und amol a Raketa in Himmel schießa.  
Gar so oft tiaz iatz numma vorbei keama,  
miar tia deas enk aber it beas nehma.  
Miar wissa, in ergschta Stress hot ma im Ruhestand,  
deas isch ja überall so bekannt!  
Miar hoffa es keamats bold amol wieder vorbei  
weil wias eas ja wissat's derlebt ma bei ins allerlei.  
Auf deas dass es it all zu long daura tuat,  
miar iat a Scheiba ausajoga aus der Gluat.

**Vollath Hubert**

Hubert uans loss dr sogä  
tua numma mit'm Auto aufs Stanzer Schnapsfescht fohra.  
A Schnapsli tuat ma ja det probiera  
aber schua sei Schandi da zum Führerschein kassiera.  
Iatz lossa mar no a Raketa steiga,  
weil es freit ins, dass alli wieder tuasch bei ins bleiba!

**Vogt Irene**

A Rakete iatz marschieret,  
weil dr Irene isch beim Schifohra an Blödsinn passiert.  
Bam Putzloch in Sea hot's Irne gschmissa  
und da hot si sich saggrisch verissa.  
A guate Besserung winscha miar dir mit dera Scheiba,  
und tu s'negschst mal mit da Schi am Weg bleiba.

**Vogt Herta**

Dr Fensterbohrer hatt in Gurnau ou zuagschloga,  
und haut Herta's Fensterstock durch ohne z'frogal!  
Dass inserer Herta im Winter it weard z' kalt,  
hatt ihra d' Altbausanierung ou eppas drinzahlt.  
Und ohne große Zora,  
isch sie die olta Fenster auf die schnelle los gwora.  
A so a Baustelle auf deine olte Tog,  
sei muaß es decht a haide Plog.  
Mir hoffa, bei dir isch iatz wieder alles dicht  
sall war ja a guat's Ende für die Fenstergschicht!  
Auf dass dir in Zukunft so an Stress nit so schnell passiert,  
dir iatz no a Scheiba bis zum Bach ocha marschiert!

**Fam Schultes Hubert Brigitte**

Stolz isch dr Hubert auf sein nuia Traktor und gia tuat er guat,  
miar mechta amol secha, wia er sein Schotz ausfahra tuat.  
Fohr amol mit dr Gitti im Mondschein irgendwo hi  
dös isch sicher a romantische Partie.

**Fam Marth Edmund Helene**

Nala und Nöni steagt dean zwao recht guat  
Mit'm Enkala isch d' Helene olli auf d'r Huat.  
D'r Edi isch ou viel auf d' Roas  
Wo er olli umgeagt - wer woaß?  
Manchsmol ziacht er z' Fuaß seini Runda,  
od'r er tuat sein Revier mit'm Auto erkunda.

**Fam Landerer Franz Elfriede**

Tia Scheiba tian mar iatz weit ausa schloga  
Dass mir mit inserm Sprichla kenna in Franz a bisali bloga..  
Als Mechaniker mit am Schlepper fohra isch ja grat a Freid,  
lei wenn der Motor numma louft isch a bisali bleid.  
Die Motorhaupa reist d' r Franz natürlich glei auf ,  
dass er kann schaua auf den Motor drauf.  
Als Fachmann scheint er sei Sach zum verstian,  
alla mögliche fehler Kontrolliert und alli tuat er no nit gian  
Des hat sicher an bestimmta Grund dass er numma tuat fohra  
vielleicht hatsch sella mit dem Sprit a bisali spora.  
Damit d' r des numma basira tuat,  
Leg mar dr iatz no a Scheiba in Gluat.

**Würthenberger Claudia u. Armin**

D´r Armin und Claudia tian in die Hauspläne viel Zeit investira  
dass mar so an Umbau konn richtig realisiera.  
Schian habt´s grichtat enker Haus,  
des schaut vo aussa richtig gmiatlich aus.  
Mir wera enker Humatli vo innen genau unter die Lupe nehma,  
wenn mar bald dia Scheiba kassiera kemma.

**Öttl Wolfgang Christina**

Im Wolfgang und dr Christine miaßa miar iatz zu ihrem schiana Gorta gratuliera,  
so manch andere tat schua längscht resigniera.  
A so an schiana Gorta braucht viel Zeit  
dia nehma sich unfach die geduldiga Leit!  
Ma sieht enk oft beim jäta und maha,  
und mit' ama Gartaschlauch die Runda draha.  
A griner Daumen und a bissli Glück keart ou dazua  
weil sinsch wars olli nou der gleich Ruah.  
Iatz isch as auf der Soga ou nett und grian,  
deas finda miar aber alle wunderschian.  
Miar hoffa enkere Begeisterung bleibt enk nou long erholta,  
auf des miar enk no a Scheiba ins Tal ocha verkolta!

**Fam Pfeifer Karl Brigitte**

Da Charly kennt sich mit denna Ölpreise auf der Welt guat aus,  
drumm hat er sich wos günstig gwesa isch gfüllt an Tank so groas wie a Haus.  
Iats konn er beruhigt des Mineraöl mit seine Laster verfiahra,  
und ganz sicher a guats Geld dafür kassiera.  
Dass der große Tank a guate Investition war  
Des isch im Charly schua klar.  
Iatz dian mar d´r no a Raketa spendiera,  
Dass den Betrieb no länger tuasch a so guat fiahra.

**Pekar Manfred und Sabine**

Wenn m´r hat a großes Haus,  
geht um die Arbeit sicher nit aus.  
Dia Stauda haba vor´m Haus miaßa weck  
dass m´r amol sieht was des isch eigentlich für an schiana Fleck.  
Am Dachboda sieht mar in Manni und in Schwiegervater alli ebas richta,  
was er da macht, wert´r ins wenn m´r kemma kassiera sicher berichta.

**Carpentari Jürgen und Sonja**

Dar Jürgen und d'Sonja hoba ket da schianschta Tog in ihrem Leaba,  
sie hoba sich huira s'Jawort geaba.  
In dar Burschl Kiarcha war dia Hochzeit mit an Haufa Leit,  
da war d'Fuierwehr natürlich ou nit weit.  
Für enkarn gemeinsama Weg wünscha mar enk nu s'bescht,  
an großer Böller sell schnella für enk ganz fescht.  
Aber deas Sprichli isch nou nit aus,  
da plaudara mar schua nou eppas aus.  
An Modellflieger hat sich dar Jürgen zombbaut,  
und weil deas Zuig sou viligran isch hat er sich nit aluan fliaga traut.  
An „Experten“ sell mit ihm deas amol prouba,  
und schua nach'm erschta Flug isch deas Flugzeug im heachshta Boam douba.  
Nur a gewagte Rettungsaktion hat'n da wieder ochabracht,  
hatsch dar wol gscheider a Rennauto gmocht?

**Fam Carpentari Reinhard Michaela**

D´r Reinhard und sei Familie tian am Computer verbringa an haufa Stunda  
Da werat´s enk im Internet für al mögliche Sach´a so richtig guat erkunda.  
Tiat´s oh öfters auf Homepage vo Graf Gurnau gian,  
da tian so manche Interessante Sacha stian.  
Da Reinhard tuat gera viele neuie Socha ausprobiera,  
da hats nit long dauert hat´r miaßa an nuia Computer installiera.  
Die neuie Anlag kann so viel Sacha,  
da kann er iatz studiera bis´m Finger krocha.

**Fam Carpentari Sandrino Rosmarie**

Vorbei isch für'n Sandi di Machozeit,  
gmiatli als Monn mit seine drei Weiberleit.  
Nit long hots dauert und flugs über Nocht,  
hoba seinu Madla männliche Verstärkung brocht.  
An dia Schwiegersöhne in spe hot ma si schnell gwöhnt.  
Und si weara ou glei vom Sandi kulinarisch verwöhnt.  
Weil Kocha kann er, des isch fix,  
bei da Kochsendunga im Fernsehn holt er si di beschta Tricks.  
Beim Fische im Summer kann si dr Sandi perfekt entsponna,  
drnoch brutzelt er dia Forella knuspri in dr Pfonna.  
Dia Raketa schiaßt aucha wia an Pfeil,  
mir wünscha dir weiterhin Petri Heil.

**Fam Carpentari Reinhard Marlies**

Dia Raketa laß mar iatz ganz weit aussa sausa,  
denn d´r Reinhard kimmt aus´m baua ou nia aussa.  
Heura hot miaßa a Solaranlage auf´s Dach,  
Denn er hot sich denkt kua Öl für´s Warmwasser braucha des war a Sach.  
Damit dia große Boiler im Heizraum Platz haba,  
hat d´r miaßa zersch a Wond abtroga.  
Schian hosch des Reimli renoviert,  
und dabei ou gnuag Zeit investiert.  
Reinhard du kannsch die Freizeit sicher ou andersch nutza,  
wo nit alli lei muasch irgend a Wand verputza.  
Di Pension muuß ma mit vollen Zügen auskosta,  
damit uom dabei nit die Knocha inrosta.

**Carpentari Carina**

Dia Scheiba tia mar weit außa schiaßa,  
und damit s´erschtmal Carina auf der Lista begrißa.  
Als erscht´s miaß mar d´r Carina amol gratuliera  
und lossa zu deim bestandana Führerschein a Raketa marschiera.  
A Auto hot nocha ou glei hear miaßa,  
Damit sie kann jeden Tag in d´r Arbeit schiaßa.  
In See tuat Sie a Lehr als Friseurin absolviera,  
hoffentlich kenna mar dir bald zur Gsellprüfung gratuliera.

**Wilhelm Karin**

Wo wohnt dr Kevin tuat a Bibli froga  
ja des isch s'letschte Haus doba auf dr' Soga.  
Blumatöpfle kluu und groß in der Infahrt stiah  
da munsch an Blumencorso isch im Enstiah.  
Opa, Oma bastla do und det  
ja Karin do hasch as ja alli nett.

**Pfisterer Dieter Christine**

Dia scheiba isch aussa, den Böller hobats keart,  
der hot der Christine und dem Dieter keart.  
Derfrot hoba mir huira nuit, sall isch guat,  
und mir hoffa, dass es guat weiter giah tuat.

**Pfisterer Peter**

Wos sellma übern Pete groß berichta,  
wenn er alli tuat auf Kappl flichta!  
Er hat huira müßa Arbeitswechsel vornehma,  
weil mit'm Felbermayer isch er numma so richtig z'fohra kema.  
Iatz sieht man olli aus ama HTB-Auto ausa locha,  
auf deis loss mar no an Böller krocha!

**Fam Haag Sabine u. Peter**

Da Peter siecht ma im Summer mit'm Radl auf Zoms ocha bolza,  
und so a Kondition hot er sicher vom viela Holza.  
Di letscht Venetsaison hot miassa mit ara Panne starta,  
hoba deine Leit eppa vergessa, dia Seilbohn zum Warta.  
Ohne Problem isch gonga der Rest der Saison -  
in Zoms dunta bei der Venetbohn.  
D' Sabine tuat da Buaba beim Trambolin hupfa zuaschaua,  
du kanntesch mitmocha und dabei manchen Stress obbaua.  
An Böller kennats iatz no hoba,  
und enk dabei beim Glühweinstandla loba.

**Fam Schütz Erwin Christine**

Die Kosta für Heizöl tian sich schua lang auf am hochs Niveau heba,  
drumm muss ma sich da a Alternative überlega.  
Heiza mit Holz isch da die richtige Sach, sall isch klar,  
da kann ma viel Öl spara s'ganze Jahr.  
Lei mia Holzpalettenstapel sieht vor'm Haus,  
da geht sich sicher dear uane oder andere Winter aus.  
Damit dia ganzen Paletta wera zu kluane Priegel g'macht,  
a nuie Fräse muss her, sall war decht gloacht.

**Schütz Manuel**

Beim Manu gibt's huira ou eppas zum Berichta,  
er hot dahuam was nuis gfunda zum in 'Garage zum schlichta.  
Die Vespas hoba sei Interesse iatz gweckt,  
drum hot er da an Haufa Zeit und Geld eichagsteckt!  
An Platz hot er ou gfunda dahuam  
so fühlt sich Erwin's Maschin nit so aluan.  
Mit Geduld weara es nou mia,  
sall war fürn Manu ou ganz schian.  
Auf dass sie alla amol funktioniera,  
lossa mar im Manu a Scheiba ins Tal marschiera!

**Fam Walter Markus Sybille**

D´r Markus und Sybille hab sich für a nuis Auto entschlossa  
Aber um den Kombi habats sicher aweil verdrossa  
Kaum isch aussa kemma beim BMW a nuis Modell  
hat des Auto miaßa vor´m Haus stian, ganz schnell.  
Mit dem Schlitta wünsch m´r enk a unfallfreie Zeit,  
dafür halt m´r enk no an Böller bereit.

**Walter Berta**

Insere Berta muaß im Summer wahrscheinlich operiera,  
dass da alls super hinhaut, lossa miar dir iatz a Scheiba und a Raketa in Himmel  
marschiera!  
Mir hoffa es geat alles guat und du bleibsch gsund,  
zum negativ vorauschaua gibt's sicher kuan Grund.  
Es sell dir danach besser gian,  
deas fanda mir alla wunderschian.

**Senn Verena**

Kaum isch die Verena ausm Gymi daußa,  
will si glei noch Innsbruck obbrausa.  
Si hot mit'm Freund in Innsbruck a Wohnung bezoucha,  
des sett olles nach Schema F obloufa.  
Auf uamol denkt si sich, Innsbrugg isch decht it so schian  
i geah decht studiara zum Papa noch Wian.  
Dett tuat si iatz Jus studiara,  
und nebabei no als Model agiara.  
In Innsbrugg hot so decht no ihren Plotz,  
bold jed's Wochenend fohrt si aucha zu ihrem Schotz.  
Gurnau isch iatz numma dein Hauptwohnsitz,  
ober du kearsch zu ins dazua, des isch fix.

**Senn Anna**

D'Anna legt viel Wert drauf wia sich's keart,  
dass ma am Sunnti in'd Kiarcha geht;  
und hot si kua Mitfohrgelegenheit,  
geht si hold z'Fuaß, si hot jo Zeit.  
Bei Wind und Wetter, ihra weart nit bong,  
spaziert si nach Pians auf'm Gehsteig entlong.  
Si geht friah gnuag los und mocht si nuit draus,  
schia longsom hold, weil bis zehna geht si des olli aus.  
Anna, moch nu weiter so und loss di nit draus bringa,  
d'Fuirwehr wünscht dir Gsundheit und losst dia Scheiba weit auasinga.

**Fam Senn Werner Brigitte**

In Pians in dr Kiarcha tuat d'Brigitte s'Lesä probiara,  
ober wenn des so weitergeht weart so bold im Stephansdom im Kardinal  
Schönborn assistiara.  
In holba Summer hot si in Wien beim Werner genossa,  
miar hoba schua bold um sie verdrossa.  
Di Brigitte ziachts magisch noch Wian,  
drweil hatt' mar's do in Gurnau decht wunderschan!  
Di Verena hot sich's ou gmiatli gmocht in Wien in ihrem Zimmer,  
und schaut im Papa wohrschainli ou a bißli auf d'Finger.  
Jo Werner, mit deim Junggesellenleba in Wian isch es iats vorbei,  
an Vorteil hots, iatz bisch numma alluan mit Putza und bei dr Kocherei.

**Senn Evi**

Vor Evi sieht und heart ma s'ganz Jahr fast nix,  
du tuasch in Innsbruck olli no Studenta betreua, sall isch fix.  
Deas Nachtleba in Innsbruck isch ou viel schianer,  
Landeck isch da im Vergleich ja viel klianer.  
Mir hoffa du tuasch es richtig genießä,  
drum tian m'r no an saggrischa Böller schießä.

**Fam Senn Arnold Ursula**

Dia Ursula hot oft wirklich a Gfrett  
Am meishta dett, wenn's Aotu nit so tuat, wos es sett.  
In enker'm nuia Auto isch sicher an Rückweartsgong installiert,  
ober wia mar k'heart hoba - dear nit olli funktioniert.  
A sou a Auto hot holt seini Tücka,  
dia kann nit amol d'r Noldi flicka  
A Raketa lossa miar itz nou in'd Runda,  
und hoffa, in d'r Wearkstott hoba si nocha dean Rückkwärtsgong wieder g'funda.

**Winkler Franz**

Vom Franz heart und sieht ma in letschter Zeit nit viel  
drum lossa miar iat zearsch a Raketa vom Stiel.  
Am Morgaz braucht niemand an Wecker und kuan Zeit,  
weil sein Hund olli zwischa fünfi und sechsi schua schreit.  
Dös isch holt amol so - und weard ou so bleiba,  
drum tian miar dia Scheiba ou richtig onreiba.

**Fam Plattner Wolfgang Angelika**

Bei's Plattners muaß olles sei Ordnung hoba,  
drzua keart ou a gscheids Platzli für jeden Woga.  
Dr Wolfgang isch scheind's ou als Zimmermann vom Foch,  
und bold steahrt der BMW trucka unter'm Doch.  
S'letscht Jahr hot dr Wolfgang braucht an beada Händ a Operation,  
und des hot ihn komplett außer Gefecht gsetzt, den orma Monn.  
Di Angelika hot ihn bediant, vo vorna bis hinta,  
vom Hoor wascha bis zum Schuachbantla binta.  
An so an Rundumservice hat ma si glei gweihnt,  
wer weart it geara vo seiner Frau so verweihnt.  
Wolfgang, mir wünscha dir, dass des mit deina Händ bold wieder optimal  
funktioniert,  
drum hob' mar dar no an dicka Böller spendiert.

**Plattner Kathrin**

Mit am Rutsch wor si Kathrin aus dr HandelsAK dauß,  
und glei hot si wos kriagt, um jeden Tog noch Landegg z'brausa.  
An fetta BMW steht auf uamol vor'm Haus,  
und do flippt sogor di Kathrin aus.  
Des Auto und ihr Job in dr Fahrschual Landeck passa guat zuanond,  
do bleibt di Kathrin wenigstens im Lond.  
Mir wüscha dir a erfolgreichs Johr und no viel mehr  
und viel Glück mit deiner beruflichen Karrier.

**Fam Traxl Richard Frieda**

ja mr hoba von enk ou ebas dafragt,  
es tiats nimma brenna, deis hot ins verzogt,  
weil ouns von de beschta Schnappsla da dunta,  
ham mr alli wieda bei enk decht drunka,  
hoffentlich hasch no oun von friare Jahr,  
weil wenn ma kemma trink ma ouns mit enk isch ja klar.  
Mr wüscha enk wiedr a guate Zeit,  
de sell ankemma bei enk mit dr Scheiba vo heit.

**Kobler Maria**

Aus d'r Gluat isch außa die Scheiba,  
iat'z tia mar a bissli bei d'r Maria bleiba.  
Gsundheit setsch in dem Leba long hoba,  
und mir wella die iatz mit'm Sprichla nummer länger ploga.  
Dear Böller sell saggrisch kracha,  
damit hasch no viel zum lacha.

**Kobler Gerald**

D'r Gerald muss beruflich fleißig expandiera,  
weil ma sicht'n seit huir mit am nuia BMW umchakutschiera.  
A neues Schild aber ou no vom Haus achi loacht,  
an Massagesalon isch da unterbracht in voller Pracht.  
Dass dear Salon guat rennt,  
die Scheiba b'sonder weit achi brennt.

**Schlatter Harald**

D'r Harry tuat sich all pot an nuies Vehikel koufa,  
damit'r in d'r Friaht nit muaß z'Fuß zum Kofler loafa.  
An Land Rover Defender nennt d'r Harry iatz sei Eigen,  
dear weart d'r iatz hoffentlich amal länger bleiba.  
Lei beim Kauf von so am Auto muaß ma saggrisch acht geba,  
sinsch kann ma im Nachhinein sei blaus Wunder d'rleba.  
Beim Abhola von dem nuia Auto hat d'r Harry vergessa die Rückbank einpocka,  
und hat sie oanfach beim Verkäufer glatt flacka.  
Dear Verkäufer kann mit ouner Rückbank alleine ou nit leba,  
und hat sie oanfach wem anderen geba.  
So a Auto ohne Rückbank tuat in Harry nit verdrießa,  
deswega kann m'a gleich in d'r Gegend umchaschießa.

**Fam Schlatter Engelbert Stefanie**

Ums's Haus umma weard olli eppas gmocht,  
wos s'Leaba nocha ruhiger mocht.  
Stuangutgartli, Biotop und wos nou all's d'rzua  
Dass ma noch d'r Orbat hot a sealigi Ruah.  
Und d'rzua für sein Schotz,  
neb'm Biotop nou an Leseplotz,  
Tiatz iatz nu recht fescht Bio-Wellness baua,  
Zur Einweihung weara miar nocha ou v'rbeischaua.

**Nöbl Hannes**

Vom Hannes kenna m'r huira lei guate Sache berichta,  
aber deas isch ou it schiach zum dichta.  
Im Summer hasch die große Leidenschaft für's Berg giahn gfunda,  
und glei draht an Haufa Bergsteigerrunda.  
Mit d'r Freindin bisch drei Tag hintereinander marschieret,  
miar hoffa du hasch d'rnach no deine Fuß g'spiart.  
Beim Fußballspiela auf d'r Playstation 3 bisch öfters vorne dran,  
Hannes du machsch da eppa a Geheimtraining schua ganz lang.  
Damit dei Studium auf d'r PÄDAK neagscht's Jahr ou wieder so guat gelingt,  
a Raketa in Himmel auchi singt.

**Nöbl Anna**

Dr'Anna, sall miaßa mar glei sogä,  
dian mar glei am Onfong a Scheiba außa schloga.  
A schwars Johr hasch hinter dir,  
s negschte weard hoffentlich bsundars schian.  
Miar hoffa dassas mit deiner Gesundheit iatz wieder aufwärts geahrt,  
und ma die Stimm nou long in dar Mai-Andacht heart.

**Fam Nöbl Ferdinand , Romana**

Bam Ferd'l iatz z\*earsch amoal a Raketa marschiert  
weil er hot ins für's Scheibaschloga a poor Birka spendiert.  
Da weara mir fiar die negschta Johr sicher gnua hoba  
Drum tian saggrisch Donk schian sogä.  
Ober trotzdem miassa mir nou eppas sogä,  
mit deiner Heizungsonlog tuasch Di schiach umchaploga.  
Mit der Technik kennsch Di sicher aus,  
nur, wenn die Gebrauchs--Onleitung Englisch isch, - nocha isch d'r Ofa aus.  
Mit Deinen Jungs und Langenscheidt Wörterbuach loss't sie deas schuan mocha,  
drum lossa miar ou nou an Böller krocha.

**Kirschner Katharina**

Dia Scheiba tian m'r weit außi schießä,  
und damit Kathi begrießä.  
Miar wünschä dir viel Glück und Gsundheit,  
und dass d'r bewahrt die Heiterkeit.  
Bleib, so wie du bisch,  
so munter, jung und frisch.

**Moschen Anni**

D'Anni isch a fromme Frau,  
sie geahrt öfter zum Kappellali durchau.  
In'ara kluana feina Runde,  
verbringt sie do so manche Stunde.  
Im negschta Johr als Guate dir,  
iatz haua mar dar no an Böller vor d'Tür.

**Wagner Walter Ingrid**

Beim Walter und bei dar Ingrid miar kennas kaum glouba,  
war vor einiger Zeit a mort's Gstank douba.  
Ihna hats a Suppa ausm Kanal ausadrukt,  
aso a Verstopfung da wearsch decht verruckt.  
Tiats enk weaga sou ara Kluanigkeit nit verdriaßa,  
miar weara enk glei a Scheiba schiaßa.  
Zum Schluss an Tipp dass sou eppas numma passiert,  
an guater Abfussreiniger da ergshta „Scheiß“ püriert.

**Fam Ruetz Markus**

Vum Markus wissa mar kuane schlimma Gschichta,  
außer das er tuat Haselmäus zichta.  
In der Wohnung, aucha, ocha, hin und her,  
wou kimmt denn deas Mistvich her.  
Ober weil in jedem Mann decht ou an Jäger steckt,  
isch deas liab Mäusli bold verreckt.  
Für dein Einsatz wella mar die belohna,  
„Weidmanns heil“ und an mort's Knall aus insarar Kanona.

**Huber Karin**

1 Bei dar Karin da gibt's nit viel zum darfroga,  
2 nu im Galzig hinter dar Kassa da heart ma di kloga  
3 Wenn die Deitscha, Franzosa, Russa und Pola die ploga.  
Tua du lei die Tiroler guat vertreata,  
für deas schiaßa mar dar iatz nou a Raketa.

**Fam Thurner Udo, Evelin**

Iatz tat ins eppas interessiera,  
tuat dein Hockschnitzelheizung guat funktioniera.  
Weil du bisch jo kürzli noch Kuba g'fohra  
um nuia Heizmethoda z'drfohra.  
Miar gloaba nit, dass dia Leit in d'r Karibik Hockschnitzla braucha  
Drum lossa miar zur Vorsicht a Raketa aucha.

**Koch Helga**

D'Helga muas weit fohra und studiara,  
dass sie kann ihr täglich Brot verdiena.  
Da kann schua passiera dass dar Gedanka verschwimmt,  
und ma numma bei dar Wohnung oder ins Auto inkimmt.  
Aber wenn dar Schlüsseldienst eh alli schnell da isch,  
no isch aso a Melleur (Mallör) nit sou tragisch.  
Dass dar deas numma tuat passiera,  
tian mar dar iatz a Scheiba anschiera.

**Pammer Herbert Kathrein Anni**

Uans muaß i iatz amol froga,  
wia sell ma vu enk zwoa eppas darfroga?  
An Spruch verbreitet Heiterkeit,  
wenn ma was woaß vu alle Leit.  
Aber ou ohne Anektote gibt's bei ins a Scheiba,  
dia weara mar weit außatreiba.

**FA Wucherer Heinz**

Die Firma Wucherer - Bau isch olla bekohnt  
Toal- aus Toal-in und im gonza Lond.  
An Haufe Socha, wos dia im Baugewerbe grad mocha  
Ma heart davon nu guati Socha.  
Für die tolle Fuirwehrprob in enkerem Betrieb tian miar ins bedonka  
Und lossa d'für an Böller vom Schronka.

**FA Wille Harald**

D'r Harald miasst ma eigenti loba,  
für sein Winterorarbeit z'Dawin doba.  
Mit seim Ski - Doo fohrt es olli zu sei'm Ferienhaus  
und mocht damit a guati Roadlbohn draus.  
Viel Leit waera dir deas z' donko wissa,  
drum weard dir v'r Fuirwehr z'Grof an Böll'r gmissa.

**FA Wille Egon**

2005 hommar' kenna verstiahn  
Dass dia Bierfassla d'rvon schwimma tian.  
Letscht's Jahr hoba si ober wieder an Schwund  
Dia wora ober numma in der Sanna - ihrem Schlund.  
Gonz unafoch, dia sei gstohla woara,  
drum tian sie iatz für an Schronka schuan Löcher bohra.  
Daß dia Fassla ou weiter im Freia sicher sein,  
lossa mira nou a Rakete mit ama hella Schein.

**Autohaus Zangerle**

Huira kenn mar s'erschtmal an Autohaus in Grof begrießa  
und tia glei a schiane Raketa schießa.  
Es stellts olli tolle Autos aus  
deis isch an wahrer Augenschmaus.  
Die Marke Hunday war bei ins ja nit so bekannt  
aber iatz kennt sie jeder im gonza Land.  
Mir hoffa enker Gschäft tuat guat loufa  
vielleicht kimmt uaner vo insera Fuirwehrmandar ja ou no a tolls Auto koufa.

**Horvarth Martha**

D' Martha isch von die junga schua gonz schia ingspont gwora,  
itz schaut sie schua aufn Leo, dass er o Zeitgericht wert in a Kindergorta gfora.  
Danoch muss sie no mitm Hund gassi gia,  
des host zusätzlich bei jedem Wetter im Gorta stia.  
Martha tuasch die holt nit gonz insponna lossa,  
und a bissli mia Zeit für die ausfossa.  
Dass dir des oh ganz schnell gelingt,  
iatz no a Raketa vom Himmel singt.

**Horvarth Thomas**

Dr Thomas hot iatz Frau, Kind und Hund  
da wearts manchmal zugiah kunterbunt.  
S' Telefon tuat er nit alli abnehma gera  
weil eppa von seir Familie kannt des ja stera.  
Wohnung isch ja schia und fein  
iatz hattasch ja wieder Zeit um bei ins bei dr. Fuirwehr zein.

**Fam Horvarth Erich Elisabeth**

Der Erich hot letscht Jahr gor nit oft glocht,  
ihm hoba die Bondscheibe s´Leba schwar gmocht.  
Zwo mal hat er in´d Klinik operiera gia miasa,  
des tut an Künstler decht ganz schia verdriaða.  
Über die Betreuung hat er sich nit bekloga kenna,  
Ma sieht jo d´ Elisabeth olli schwara Zuig umma renna.  
Erich mit hoffe dass du numma lang musch danebt stia,  
und salber konsch mitm Zuig gia.  
Das dir des set möglichst schnell gelinga,  
lossa mar no a Raketa in a Himmel singa.

**Horvarth Heidemarie**

D´ Heidi tut sich ja gornumma umma treibe,  
dia tut ja nu mia par Arbeit leida.  
Neben Geschäftsumbau hot sie im Dreck no Arbeita miassa,  
des kann um decht richtig verdiaða.  
Dass nit lei mit deine Fotos in der Dunkelkommer bischt,  
iatz no a Raketa in a Himmel zischt.

**Horvarth Iris**

Was mir über d´ Iris kehrt hoba kenna mar fast nit globa,  
sie isch hura im Jänner mim Rucksack noch Indien gfloga.  
In Goa am Strand hat sie sich selber gfunda,  
und nit die Zeit beim Schlecker mit lästige Kunda abgschunda.  
Mir hoffe dassas dir dahum oa wieder gfolla tut,  
und schmeissa no an Böller in d´ Gluat.

**Fam Nitsche Kurdoglu Gerald Brigitte**

Dr Gerald treibst ja richtig bunt  
und so kriagscht an Ehrenzeichen vom Bund.  
Dass er nit lei mola kann,  
deis wissa mira schua long.  
Minderheiten tia ihm am Herza liega  
insere Scheiba set bis zum Karnerwaldele ochafliega.  
Am Schluss mehta mir dir für die Auszeichnung herzlich gratuliera  
und dir und dr Brigitte a schiene Raketa spendiera.

**Fam Schmid Robert Monika**

D`r Robert hat sei Haus guat im Schuss,  
da isch jeden Tag erst am Abend mit der Arbeit Schluss.  
Der Rasa isch beianand wie an Teppich,  
i glob im Garta gibt´s o an Rettich.  
Sonst wissa miar über enk nit viel zum Dichta  
hoffentlich wissa mir bis nächst Jahr mia zum Berichta.

**Maidel Johann**

N`Johann hosch alli schu kenna begeistera mit technische Socha,  
aber alls isch intz nit klor, was da tuasch mocha.  
Isch im Haus alles sauber und putzt  
der Johann in Gorta ausruckt.  
Vor der Tür im Rosa umanand sieht mat ihn sausa  
und mit Staubsauger über Blümli brausa.  
Miar wella dir des nit verwehra  
wenn mit'm Staubsauger tuasch Junikäfer einkehra.  
A Raketa in Himmel aua singt  
dass die Technik ou was bringt.

**Maidel Wilfried**

Vom Willi tuat mit nit leicht was dr'froga  
ma sieht'n hin und wieder mit ama Dienstauto fohra.  
Im Roppener Stolla da hat er was zum tian  
und fährt mitm Auto glei icha, weil nocha brauch i ja nit gian.  
So manch großem Bagger fällt so a Auto nit auf  
und schu schiabt er s'Willi Dienstauto und fährt aufn drauf.

**Matt Christian**

D'r Christian tuat sich olli fleißig beim Kofler engagiera,  
im Winter sogar am Wochenende in die Firma marschiera.  
Um so an fleißiga Mann isch sicher jeder Chef froh,  
dear was für d'Kunschaft hat olli an offenes Ohr.  
An Böller iatz no ganz laut klingt,  
damit bei d'r Arbeit weiter alles so guat gelingt.

**Fam Matt Richard Rosi**

D`r Richard u. Rosi haba sich gega des Hochwasser was infalla glatt,  
und sich Prellwände baut wie in einer holländischa Stadt.  
Die Schaltafla kann ma am Parkplatz in Boda icha stecka,  
da sei o viel Löcher im Asphalt, da braucht ma nit d`r schrecka.  
Vielleicht kann´sch des tolle Patent no öfter verkoafa,  
ma kann´s ja Grafer Wasserwehr tofa.  
Iatz lossa miar no an Böller kracha,  
vielleicht mach´sch ja no mia so tolle Sacha.

**Fam Matt Egon Annemarie**

D`r Egon hat seinen Zaun hinterm Haus repariert,  
da isch es schua passiert.  
Er rutscht aus und isch dabei auf den Rugga gfloga,  
da hat er sich a paar Rippa brocha-des isch nit gloga.  
Wia weah des tuat des isch wohl jedem bekannt,  
daß Du no so grad geahn kann´sch isch ja allerhand.  
Miar winscha Dir a guate Besserung bis zum nächsta Jahr,  
iatz no a Raketa aucha fliagt wunderbar.

**Petter Johann**

D`r Joschi isch an sportlicher Mann,  
der was viele verschiedene Sportarten kann.  
Beim Eisloafa isch er schnell wie an Blitz,  
da g`winnt er bei jedem Renna, sall isch fix.  
Bei die Special Olympics hat d`r Joschi zwoa Goldmedaillen gwuanna,  
da isch`r so schnell glofa, dass deas Eis war fast weg grunna.  
D`Fuierwehr tuat dir für die Leistung no herzlich gratuliera,  
und drum lassa mir no a Raketa auchi marschiera.

**Franz Friedrich + Elisabeth**

Friedrich und Elisabeth, es isch schua schwar,  
d`Gschichta über enk sein rar.  
A Scheiba für enk außageht,  
auf das ma amol eppas heart.  
Viel Glück schicka mar enk nou aus,  
aber s`nepscht Johr keamats ins numma draus.

**FA Streng**

Die gelbe Auto, wie jeder weiß  
sei vor Firma Streng überroll auf d'r Stroß.  
Ob im gonza Lond oder z'Starkaboch  
Glo'da hoba si olli bis über's Doch.  
An Böll'r lossa miar iatz nou krocha,  
weil ou dia Bagger olli a guati Orbat mocha.  
Zur 50 Joh Feier tian miar selbstverständli gratulieren  
Und lossa ou nou a Raketa marschiera.

**FA Walch + Plannger**

Plana und projektiera für's gonze Lond  
d'r für isch die Firma Benatt bekonnt.  
Wie nit olle wissa,  
weara do schiani Pläne g'schmissa.  
Und daß die Projekte ou guat gelinga,  
lossa miar zur Scheiba nou a Raketa singa.

**Fuchsberger Mario & Bettina**

D`r Mario u. Bettina derfa mir huira auf inserer Lista zum zwotamoal begrießa,  
es werdet wohl nit um Landeck verdriessa.  
Der Mario tuat da Leut Versicherunga verkofa,  
Bettina isch Turnlehrerin und lasst die Kinder im Turnsaal umalofa.  
D`r huam- im Strenghaus im 1. Stock - haba sie schua viel erlebt,  
da hat, im Frühjahr kurz die Erde bebt.  
Die Bolkonplatta hat seinen Weg ins Schlafzimmer g´funda,  
es isch niemand was passiert, es isch ja fast a Wunder.  
Miar hoffa es werded no long in Graf bleiba,  
nocha gibt´s nächst Jahr wieder a Scheiba.

**Geschäft Aglamaz**

Ja Leit in Graf kann ma guat inkoufa,  
ischas dringend, muaß ma lei zum Aglamaz loufa.  
Frische Socha jeden Tag,  
und deas zu Preisen, dia ma sich vermog.  
A Scheiba iatz für enk auða singt,  
dass'as enk an Haufa Kundschaft bringt.

**Asia Cafe**

Asia Cafe isch schua a weil bei ins in Graf,  
da geniast man als vom türkische Tee und bis zum Burger mit Schaf.  
Bei enk werd mia alli herzlich empfonga,  
um a schrägs Wort braucht ma da nit ponga.  
Mir wünscha enk no viel Erfolg und gute Geschäfte,  
mit inserta Scheiba wünscha mir das aller Beste.

**Schröcker Evelin**

Evelin isch in letzter Zeit numma viel da-huam d´r wischa,  
dia werd wohl nit so long am Abend in der Bank uma zischa.  
Mir wissa nix genau was da kannt sein,  
vielleicht gibts ja an nuia Sunnaschein.  
Die Winterzeit isch ja bald vorbei,  
und des Frühjahr isch o schua glei.  
Evi lass ins nit länger mit neuen Info warta,  
mir iats glei no a Raketa starta.

**Fam Schröcker Hermann Elfriede**

D`r Hermann hat sich an alta Grenzstuan im Garta aufbaut,  
den hat er beim Bundesheer beim Vermessa abbaut.  
Es isch für Ihn a schiane Erinnerung an seine Zeit als Soldat beim Heer,  
die Wanderungen auf die Berg Vermisst er wohl sehr.  
Da Garta tuat er s´ ganz Jahr pflega,  
im Herbst isch die große Ernte des isch nocha für die viele Arbeit der Sega.  
Miar wünscha enk no viel spaß im Garta,  
mir derfa iatz no mit an Böller aufwarta.

**Schröcker Franziska**

Franziska isch in Innsbruck beim Studiera,  
da sieht ma si numma oft in Graf spaziera.  
Obwohl ihr Schatzi wohnt ja in Landeck-Stadt,  
des isch der Armin den sie da hat.  
Angeblich isch er schua amal ihr Liebling gwesa,  
sie kehra ja bekanntlich besser, die alta Besa.  
Miar wünscha Dir no beim Studiera no viel Spaß,  
iatz erheba mir alle zamm ,auf die, des Glühwein- Glas.

**Hotz Martin + Maggi**

Dar Martin, Leit deas miaßats wissa,  
isch sou eppas wia insar Gwissa.  
Sei Hearz fescht für d'Grafer Fuierwehr schlogt,  
ma siehsts, was dear Idea hot.  
A super Prob hat er ins organisiert,  
drum hat er a feschts Dankschian verdiant.  
Ou in Zukunft sou viel Elan und Schwung,  
und iatz dia Scheiba fliagt a drum.

**Fam Hotz Raimund Monika**

D`r Raimund und Monika isch a Kotza zuglofa,  
da hoäßt oft aufstian vom Sofa.  
Des Tier braucht viel Liebe und Pflege,  
aber sie bringt oft an Kater mit in die Hege.  
A paar Monat spater bringt sie o no die Junga zum fressa vorbei,  
da hat Monika g´ sagt da muaß was G´ schechn aber glei.  
Schnipi schnapi, der Doktor macht dem Fortpflanzungs- Problem glei den gar aus,  
nacha isch wieder Friede im Kotza Haus.  
Tiats enk nit z` viel mit dena Viecher ploga,  
dafür wera miar enk no a Raketa aucha joga.

**Hotz Lydia und Beate**

D'Lydia tuat unter'm Jahr fescht orbeita und spora,  
dass si kann mit dr Schwester in Urlaub fohra.  
Auf den Urlaub in Rom hot si si schua long gfreit,  
ober dass si do dunta aufpassa muaß, hot ihr wohl niamand gseit.  
So hot si bold eppar zuacha traut,  
und dr Lydia ungeniert di Geldtascha klaut.  
Iatz loss mar zum Trost no an Böller knolla,  
miar hoffa, der Urlaub hot dir trotzdem gfollla.

**Hotz Hannes**

D`r Hannes hat a nuis Hobby g` funda,  
er pflanzt und grabt hinterm Haus oft viele Stunda.  
Da werd überlegt wia kann ma die Landschaft toll gestalta,  
er kann dabei seine Kreativität frei entfalta.  
Im Büro hat er o viel zum Tian,  
da isch aso an Ausgleich wirklich schian.  
Hannes miar wünsch Dir no viel Spaß dabei,  
iats no an Böller knallt aber glei.

**Fam Hotz Oskar Edith**

D`r Oskar hat die Heizkosten fest im Griff,  
er erteilt der Motorsaga da letzta Schliff.

Danach geahnts in Nachbars-Garta an jedem Baum an den Kroga,  
daß des nocha an haufa Hitz im Ofa gibt des braucht ma ja nit extra sogä.

Im Summer wera im eigana Garta neue Jungbäume an pflonzt,  
des nocha in a paar Jahr wieder durch Ofatür icha tonzt.

Aber der Oskar o an die Zukunft denkt,  
und es ihn alli mia zum Gasanschluß hin lenkt.

Mir wünschä dir und d`r Edith alles Gute fürs nuia Jahr,  
mit einer großen Holzlega tonnaschwar.